

# LA SAGRA DI PATATI

*A l'è in Settember che l'Orenes al voeur festeggia  
cont ona bella banda che la sona a tutt andà,  
in dalla piazza dalla gesa a gh'è un palch che finiss pu  
per fa dei bei spettacol cont la compagnia di firlinfu,*

*l'è la sagra di patati, l'è la festa del contadin  
a sa festeggia la patata, la patata de Oren,  
al paes al sa da de fa per pudè partecipà,  
perchè chi a sa dev no parlà, ma bisogna laurà.*

*Oramai a l'è diventada ona bella tradiziòn  
e disem che l'è l'orgoli da tutta la popolaziòn,  
i da pensà che ogni ann a gh'è semper di novità  
per cercà in tutti i modi de rallegrà e accontentà,*

*quanta gent che vègn da foera non solament per curiosà  
ma per vedè o per mangià certi bei piatt che se po gustà,  
a gh'è in da l'aria on odurin di pitansit di di pasà  
roba bona da Brianza che la tegn tanta sostanza,*

*insomma a ga nè per tucc e per tutt i gust,  
gnocch, patati frit, turti, fritèi, turtèi ma da quei bòn  
che te fa vegnì la tentaziòn da mangià senza remission,  
e senza ciappà la ciocca e minga nanca fa digestiòn,*

*se pò a sa vè in via busèca, là in curt dalla piasèta  
in dove sa fa un bel prans cont tutt i so specialità,  
là; a gh'è i coeugh e al personal cal san lur come ben trattàa,  
e ditati tucc a vegnan via sodisfaa e content in dal mangià.*

*Ades però a voeuri tentà da spiegà un momentin  
in che modo a la sa festeggia la sagra chi a Oren:  
l'è una festa folkloristica cont on vero significàa,  
però mi al moment al savaria no da che part comincià,*

*quindi, l'unica roba a l'è da vegnì chi a senti, a vedè  
a esplorà tutt i belezze che a Oren a sa po truvà,  
vedari che sari no delus, ma content e da bon umor,  
perchè chi a gh'è vita, allegria, e anca tanto amor.*

*quanti che ciapan l'Occasiòn per vegnì a vedè la sfilada,  
e a gh'an resòn,  
perchè a l'è nò una stupidada ma una kannunada,  
a gh'è sta un po d'ann fà che l'han fada vedè per television,*

*l'è stà un gran succes che sin congratulà cont l'organisasiòn,  
se voeurum di la verità, la nostra Direziòn  
a l'è semper stada a l'altezza dalla situaziòn,  
e disem anca: che sa gh'è un quei coss da organizzà  
a in di vulpuni, e a gh'è nissun che ga la fà,*

BRAMBILLA ANSELMO